

SCRIPT OF EVENING GOJRI NEWS BULLETIN 25JULY 2026

1700HRS

اوننگ گوجری نیوز بولیٹن 25 جولائی 2026

یوہ آکاشوانی جموں بے نصرت تے طارق ابرارتیں خبر سُنو۔

HEADLINES

- ۱۔ وزیر تعلیم دھرمیندر پردھان نے طلبہ غا احتجاج غی وجہ نال پیدا ہوئی صورتحال گے پیش نظر اپنو استیفو وزیر اعظم نریندر مودی نانہہ پیش کردتو ۔
- ۲۔ درس لداخ مانہہ کرگل وجے دیوس تقریبات گا سلسلہ مانہہ وزیر دفاع راج ناتھ سنگھ اج سرینگر پُجیا، لیفٹیننٹ گورنر منوج سنہا نے سرینگر ہوائی اڈہ ور وزیر دفاع غو شاندار استقبال کیو۔
- ۳۔ لیفٹیننٹ گورنر منوج سنہا نے قومی تعلیمی پالیسی گا 6 براں مکمل ہون گا سلسلہ مانہہ سرینگر مانہہ ڈل جھیل غے کنڈا تیں ریڈنگ میراتھن نانہہ جھنڈی دس غے روانہ کیو۔
- ۴۔ خراب موسم غی وجہ نال 6 دنن گا وقفہ تیں بعد شری ماتا ویشنوی دیوی شرانین ور عقیدت منداں گو پاری رش دیکھو کیو۔
- ۵۔ محکمہ موسمیات نے اگلا 5 دنن غے دوران جموں کشمیر مانہہ کُجھ خطرناک جگہاں ور سیلاب ، پسی پین تے زمین کھسکن غی پیشن گوئی کی ہے۔

PRADHAN RESIGNATION

مرکزی وزیر تعلیم دھرمیندر پردھان نے اج اپنا عہدے تیں استیفو دے دتو ہے تے اُنہاں نے اپنو استیفو وزیر اعظم نریندر مودی نانہہ پیش کیو ہے۔ اُنہاں نے سماجی میڈیا ور ایک پوسٹ مانہہ کہیو کہ گزشتہ دس دنن تیں طلبہ غا احتجاج تیں بعد پیدا ہون آلی صورتحال ور اُنہاں نانہہ بہت افسوس ہے۔ اُنہاں نے کہیو کہ یوہ اُن واسطے انا غو معاملو نی ہے۔ دھرمیندر پردھان نے کہیو کہ نوی دہلی غا جنٹر منتر تے ملک غا دیگر حصاں مانہہ جاری حالات نانہہ دیکھتا واں تے اس گل نانہہ یقینی بنان واسطے کہ کوئی وی ملک دشمن طاقت اس صورتحال غو فائدو نہ چاسکے تے کسی وی طالب علم نانہہ مستقبل غی قانونی پیچیدگیاں مانہہ نہ پھسنو پے، اُنہاں نے وزیر اعظم نانہہ اپنو استیفو پیش کرن غو فیصلو کیو ہے۔

LG RAJNATH

لیفٹیننٹ گورنر منوج سنہا نے اج سرینگر ہوائی اڈہ ور وزیر دفاع راج ناتھ سنگھ غو استقبال کیو۔ لیفٹیننٹ گورنر نے سماجی میڈیا ایکس ور ایک پوسٹ مانہہ کہیو کہ اُنہاں نے وزیر دفاع غو گرم جوشی سنگ خیر مقدم کیو۔ راج ناتھ سنگھ دو روزہ دورہ ور لداخ گا درس جارہیا ہیں۔ اپنا دورا غے دوران وہ اگلا مورچاں گو دورو کریں گا۔ تے کل کارگل وجے دیوس غا موقع ور کارگل وار میموریل مانہہ ہون آلی تقریب مانہہ شرکت کریں گا۔ یہ تقریب سن 1999 غی کارگل جنگ مانہہ

بھارت غی فتح غی یاد مانہ منعقد کی جارہی ہے۔ اس موقع ور سنٹر سیول تے
دفاعی حُکام وی ہوائی اڈہ ور موجود تھا۔

PROG ANN

آکاشوانی جموں غو علاقائی خبراں آلو شعبو پلک یعنی 26 جولائی 2026 نانہ
تھاڑی غا 2 بج غے 30 منٹ ور کارگل وجے دیوس غا موقع ور 30 منٹاں ور مبنی
ایک خصوصی مباحثہ ور پروگرام نشر کرے غو۔ اس خصوصی پروگرام غو
موضوع وے غو ، نمں تے سمان ۔ اس خصوصی پروگرام مانہ مارا مہمان وین
گا ، ریٹائیڈ کرنل آر کے شرما جہیڑا پروگرام غا موضوع ور اپنی قیمتی رائے
تے ماہرانہ خیالات سانجہ کریں گا ۔ پروگرام غی میزبانی کریں غی ماری انکر
شروتی کھجوریہ۔

LG MARATHON

لیفٹیننٹ گورنر منوج سنہا نے اج ڈال جھیل غے کنڈے ریڈنگ میراتھن غو افتتاح
کیوجس غو اہتمام نیشنل بُک ٹرسٹ نے قومی تعلیمی پالیسی گا 6 براں مکمل ہون
ور تعلیمی ہفتہ غے دوران کیو تھو۔ ہزاراں طالب علماں سنگ خطاب کرتا واں
لیفٹیننٹ گورنر نے کہیو جے تعلیم نانہ جماعت گا کمرہ تیں آگے روز مرہ غی
زندگہ توڑی پھیلانو چاہیے۔ ایک برے مستقبل واسطے دوڑیں عنوان غے تحت
میراتھن نے پڑھن ، تندرستی تے ماحولیاتی ذمے داری ناں باندو دتو۔ لیفٹیننٹ
گورنر وجے دیوس تیں پہلاں کرگل جنگ گا ہیروز غی ہمت تے نظم و ضبط نانہ
یاد کرتا واں نوجواناں تیں پڑھن غی عادات پیدا کرن ، ماحولیات غی حفاظت کرن
تے قوم غی خدمت کرن ور زور دتو۔ اس موقعہ ور خطاب کرتا واں ایل جی
موصوف نے اس طرح کہیو۔-----

SMVD YATRA RESUMES

لگاتار بارش غے باوجود کٹڑا مانہ اج ماتا ویشنوی دیوی شرائین ور عقیدت
منداں گو رش دیکھیو گیو کیونجے 6 دن یاترا معطل رہن تیں بعد اج خوش اسلوبی
سنگ بحال ہوئی تے ہزاراں عقیدت منداں نے اج ضلع ریایس مانہ ویشنو دیوی
شرائین ور حاضری دین واسطے اپنو سفر شروع کیو۔ شرائین بورڈ تے سلامتی
ایجنسیاں نے عقیدت منداں غی حفاظت نانہ یقینی بنان واسطے رستہ مانہ
ایمرجنسی رسپانس ٹیمیاں طبی عملہ تے ڈیزاسٹر منیجمنٹ گا عملہ نانہ تعینات کیو
ہے۔ حُکام نے یاتریاں تیں احتیاط برتن ، سرکاری ہدایات ور عمل کرن تے
خطرناک علاقاں تیں بچن غی اپیل کی ہے۔ یاترا نانہ مکمل حفاظتی جائیزہ تیں بعد
بحال کیو گیو۔ آکاشوانی گا خبراں آلا شعبوہ نال گل کرتا واں عقیدت منداں نے
اس طرح کہیو۔-----

JKTPO INDUS FOOD

جموں کشمیر ٹریڈ پرموشن آرگنائزیشن انڈس فوڈ احمدآباد 2026 مانہ جموں کشمیر
غی پریمن خوراک ، زراعت تے باغبانی غی مصنوعات غی نمائش کر رہی ہے
جموں کشمیر پولین مانہ جی آئی ٹیگ شدہ خصوصی مصنوعات شامل ہیں یاہ

نمائش ایم ایس ایم ای فارمر پروڈیوسر تنظیمیں خواتین کاروباریاں نانہہ ملکی
تے بین الاقوامی خریداراں نال رابطو کرن واسطے پلیٹ فارم مہیا کرے۔ عہدے
داراں نے کہیو جے شرکت غو مقصد جموں کشمیر غی مصنوعات نان بابدو دینو
برآمدی موقعاں نانہہ بدھانو تے مقامی کاشت کاراں واسطے منڈی توڑی رسائی
نانہہ مضبوط بنانو ہے۔ امید ہے جے اس پہل نال تجارت نان بابدو ملے غو۔
مصنوعات غی نمائش مانہہ بابدو وے گو تے جموں کشمیر یونین ٹیرٹیری مانہہ
پائیدار اقتصادی ترقی مانہہ مدد لبے غی۔

MANN KI BAAT

وزیر اعظم نریندر مودی ملک تے بیرون ملک رہ رہیا بھارتی شہریاں سنگ پلک
سویرے 11 بجے آکا شوانی ور من کی بات پروگرام مانہہ اپنا خیالات سانجہ کریں گایا
مانہہ ریڈیو پروگرام غی 136 ویں قسط وے غی۔ یوہ پروگرام آکا شوانی، دور درشن، اے
آئی آر نیوز ویب سائٹ تے نیوز آن اینر مو بائل ایپ ور نشر تے ٹیلی کاسٹ کیو جائے گو۔
اس توں علاوہ یوہ پروگرام اے آئی آر نیوز، ڈی ڈی نیوز تے وزیر اعظم غا دفتر تے اطلا
عات و نشریات غی وزارت غا یوٹیوب چینل ور وی براہ راست نشر تے ٹیلی کاسٹ کیو
جائے گو۔ آکاش وانی اس پروگرام غی بندی نشریات غے فوراً بعد اس نانہہ علاقائی
زباناں مانہہ وی نشر کرے گو۔

UDH WATER SUPPLY

محکمہ جل شکتی نے کہیو ہے جے لگاتار ہون آلی بارش غی وجہ نال ضلع
ادھمپور مانہہ 102 پانی غی سپلائی سکیمیں نانہہ نقصان پُجیو ہے۔ جن وچوں 27
شدید متاثر ہونی ہیں۔ ایگزیکٹیو انجنر محکمہ جل شکتی مہیش شرما نے کہیو
دریائے توی مانہہ زیادہ گندگی غی وجہ نال بحالی گا کماں مانہہ رُکاوٹ آئی ہے
جس غے پیش نظر ادھمپور شہر مانہہ متبادل دن پانی غی سپلائی کی گئی ہے
رام نگر چینی تے کئی دوجا گرائیں علاقہ سب تیں متاثر ہوا ہیں۔ بحالی گو
کم موسم غی صورتحال بہتر ہون ور شروع ہو جے غو۔ تے امید ہے جے مرمت
غو کم ایک ہفتہ گے اندر مکمل ہو جے غو۔ اس بارے گل کرتا واں محکمہ جل
شکتی گا ایگزیکٹیو انجنر مہیش شرما نے اس طرح کہیو۔

WEATHER

محکمہ موسمیات نے پیش گوئی کی ہے جے اج تیں 27 جولائی توڑی جموں صوبہ
گا بکھ بکھ مقامات ور ہلکی بارش گرج چمک غے سنگ بارش گو امکان ہے
جد کہ بعض علاقاں مانہہ خاص طور ور سویرے یا دیر شام کدے کدے شدید
بارش وی ہوسکے۔ محکمہ موسمیات غے مطابق، 28 جولائی تیں 31 جولائی غے
دوران ایک نوو بارشاں گو سلسلو متوقع ہے جس غی وجہ سنگ پورا مرکزی
زیر انتظام علاقہ خصوصاً جموں خطہ مانہہ وسیع پیمانہ ور بارش تے گرج
چمک ہون غو امکان ہے۔ حکام نے لوکاں نانہہ مشورو دتو ہے جے وے چوکس
ریں تے بارشاں گا دناں مانہہ موسمی ہدایات ور عمل کریں۔ اس بارے مزید
جانکاری دیتا واں محکمہ موسمیات غا ڈائریکٹر مختار احمد نے اس طرح
کہیو۔
